

四庫全書

集部

欽定四庫全書

集部

文忠集卷六十六

詳校官庶吉士_臣李傅熊

主事_臣呂雲棟覆勘

總校官進士_臣楊懋珩

校對官學正_臣李巖

謄錄監生_臣黃嵩齡

欽定四庫全書

文忠集卷六十六

平園續稿二十六

宋 周必大 撰

神道碑六

敷文閣直學士陳公良翰

神道碑 嘉泰元年

自紹興壬午迄乾道壬辰十年之間士大夫舉端人正
士陳公邦彥必在焉蓋其議論專以格君非定國是挾
持公道斥遠姦佞為本當高宗內禪前二日寘之六察

以遺孝宗作其即位徧歷給諫每行其言立儲之初召長宮僚期大用於他日三聖相遺如此而歲不我與公則逝矣天下至今惜之其子耆壽等以書謀某曰先人即世三十年侍講朱公燾嘗狀其行而墓碑未立烏臺虎觀之僚道同志合惟公獨在敢固以請予雖老詩尚能追記大畧乃序而銘之公諱良翰邦彥字也世居台州臨海縣曾祖咸寧妣吳氏祖懷漸妣朱氏父守中贈奉直大夫妣碩人洪氏公幼孤天資莊重讀書輒通要

指為文氣槩不凡中紹興五年進士第以左迪功郎主
紹興府會稽縣簿秩滿陞從事郎知明州慈溪縣事導
德門一鄉渠溉田利民改宣教郎知温州瑞安縣轉奉
議郎俗號強梗吏治尚嚴公獨撫之以寬租稅揭示名
物人競樂輸聽訟率得其情或問何術公曰清水明鏡
不可形逃心澄亦猶是矣丁內艱服除充衢州教授轉
承議郎三十一年冬用殿中侍御史吳芾薦入御史臺
為檢法官明年六月擢監察御史孝宗宗覃恩轉朝奉郎

賜緋魚袋金主完顏雍新立求和中原舊人多來歸詔問何以處之公言議和復受降皆非是自治可也復詢時務公請明階級以修軍政核軍實以豐財用禁折變以蘇民力省堂選以抑奔競官當久任賞罰當合衆心隆興元年七月除左正言首陳納諫脩德畏天恤民語極剴切敵移書取淮泗唐鄧且邀歲幣公持不可詔遣盧仲賢李拭充使公言仲賢輕儇拭北來難信又言廟堂督撫異議恐失事機楊存中久擅兵柄太上皇罷就第

奈何復假使名付以邊事上皆嘉納公因言權宜與敵
和名分不可不正陵寢不可不歸四州不可復與降付
不可遣邊防不可弛上曰朕志已定於是書用敵國禮
而降付不復遣俄以戶部侍郎王之望知閤門事龍大
淵往議四郡陵寢及歲幣事公與侍御史周操復言四
郡固不當議若歸陵寢乃予歲幣聘使未應出境有詔
侍從臺諫集議多附公說上為罷使第命小臣胡昉楊
由義充審議官十二月遷左司諫成恭皇后受冊錄內

外親屬二十五人公論其泛詔減七人昉由義既辱命宰相猶議和不置且欲罷督府右正尹穡助之公言出不用以直敷文閣知建寧府二年四月也兩淮已撤備敵遂大入上深悔之太學生數百人伏闕乞召用公等不報用治就升本路轉運副使作觀風九詠諭厚本善俗之意行部不許治道供張例餽皆却之改提點江東刑獄又徙浙西歷朝散朝請郎乾道四年十一月以宗正少卿召還五年兼權太常又權侍立官又兼權給事

中四月擢兵部侍郎賜服金紫浙東風水敗秋稼州縣
隱蔽公白遣漕臣按視賑恤官吏多抵罪兼同脩國史
轉朝奉大夫十二月除右諫議大夫臨安帥多創攝局
私親故秀守遣吏市燈中都聞公除目皆懼而輟公入
對以敬天愛民脩政官人四事為獻六年正月戊辰大
雨震電庚午大雨雪公請畏天戒正庶事儲位未正手
疏言之先是上雖勉從和好志在恢復有王天覺者用
聚斂擊刺之術迎合為圖冊因近習以進得樞密院編

脩官言者交攻未聽因公極論始去之史正志憚守成
都創發運使得黃公奏祖宗立國於汴重兵屯西北故
運東南之粟今軍國就食東南此職安用疏累上面闕
再三繼以求去上還其奏公論列不已正志竟罷公嘗
言蜀漢之師下關陝由荆襄趨韓魏江淮擣青徐今日
大計也四川既命大臣宣撫荆淮自當一體又言中興
初如劉光世之部落韓世忠之背嵬張俊之親隨皆擇
驍銳優其廩餉以勵諸軍故能所至成功願取以為法

上然之下其制於諸將宗寺玉牒書成轉朝散大夫七月進給事中纔兩月節度使成閔冒請真俸有司坐獲譴閩門王抃矯詔遣安人謝顯出竟顯抵罪而置閔及抃不問公並封勅還之明日改除禮部侍郎固辭不拜以敷文閣待制提舉江州太平興國宮七年起知婺州未上召為太子詹事連詔趣行仍命州郡禮遣既對上勞勉甚至未幾命公與某同對選德殿手錄唐太宗與魏鄭公論德仁功利之說批聖語於後使極陳今之未

至者公退而上疏曰仁德治之本功利治之效務其本則效自至今水旱數千里流殍萬計是承天意者未至也欲任賢能而張栻一言遽從外補欲退小人而正志方逐張松繼之松罷韓玉又進矣欲擇將帥而腹剝交結如初欲收軍情而老幼困於移戍至如祥刑叅用武臣久任乃復數易誠能革此八弊則仁德無累功利自致疏奏上悅以示輔臣旋命公及某並兼侍講俄以足疾乞去詔聽五日一朝力辭不允十二月遂告老上知

公果病除敷文閣直學士再提舉興國宮就賜誥身衣帶八年四月轉朝請大夫致仕癸丑卒於正寢享年六十五爵臨海縣開國男食邑三百戶待贈大中大夫是歲十月壬申葬縣之義城鄉疊石山之原諸子升朝累贈金紫光祿寺大夫妻碩人朱氏累封魯國太夫人後公二十五年薨四男元壽通直郎福建安撫司幹辦公事後十九年卒者壽朝請郎新權發遣常州彭壽朝散郎通判沅州廣壽朝奉大夫行太常丞兼權倉部郎官

修身好學皆有家法二女朝散郎前通判撫州朴宣教
郎前監兩浙轉運司物斛官吳洎其壻也孫男十八人
文之奉議郎知隆興府新建縣前卒振之國子進士楊
之後之方之國子進士擇之孚之奇之迪功郎新饒州
司戶叅軍謙之文林郎新袁州軍事判官孚之誠之太
學生說之供之淳之詠之挺之存之仔之孫女八人長適
迪功郎南劍州尤溪縣尉范大雅次適進士黃如阜石
繼時迪功郎新撫州金溪縣主簿趙師羔文林郎新潭

州湘潭縣丞趙汝适次在室次適將仕郎趙希賢次尚
幼曾孫男女二十一人公質直好義氣和而守正早為
族父禮部侍郎公輔所知期以遠器自寒素至通顯奉
養如一內難後不復入私室用度悉出祿賜未嘗問產
業誨督子孫接誘後進孜孜不倦人有片善力加稱獎
不善則規正之既薨十八年光宗踐祚追思舊僚官未
應詔特以獻肅易其名禮部尚書尤袤之守台也邦人
乞祠公於學尤公以為宜繪公與提刑羅達及族父小

宗伯合而祠之榜曰三老有奏議文集二十卷銘曰
三聖相授精一惟心大政所治左右惟人侃侃陳公端
諒清醇鴻漸於朝適宏厥聲堯老欲傳寘諸臺評重華
繼承地禁職親獻可替否盡忠竭誠身有進退道無訕
信禹在震方溫文日新宮尹就宜公惟當仁胡不萬年
遂都四隣天以遣直成其令名我為銘詩式穀來今不
顯臣良於昭君明

敷文閣學士李文簡公燾神道碑

嘉泰元年

韓愈以天刑人禍歸咎史筆柳宗元隨闢其說後人終致疑焉今以李文簡公驗之何疑且左氏紀諸國之事史記上下數千載是是非非利害不專及當世若公續司馬光資治通鑑為本朝長編上闕國體下涉諸臣之家非異代比使天刑人禍可信孰能結知明主是相多士生歷清要沒定美謚諸子繼踐世科歷二千石光顯未艾如李氏者乎況公出入中外見謂忠直盡言交游貌示強禦雖微作史自當齟齬難合然讒間不行于朝

士大夫鮮食怒者何也守道正蒞職公事上不欺應物
無心天人交助其在茲乎既沒十八年蜀多文士其子
不近求銘詩而遠屬耆老非以同朝久相知深也歟是
宜序而銘之公諱燾字仁甫一字子真系出唐曹恭王
季子右武衛大將軍懿武后斥為民徙眉州之丹稜縣
遂家焉六世祖瑜始復屬籍仕至長江令公長江令六
孫曾祖夔祖夙贈奉直大夫考中朝奉大夫知仙井監累
贈宣奉大夫妣碩人史氏公生政和乙未天資穎異博

覽經傳獨不樂王安石學甫冠已著兩漢鑑明年追念靖
康變故著反正議十四篇人皆竒之紹興八年第進士
調成都府華陽縣主簿未上讀書本縣龍鴈山命曰吳
巖自記云子真子三卜居乃得此山向東南位西北其
位為吳為乾蓋處身非乾徙無以立應物非吳順無以
行易六十四卦仲尼撮其九而三陳之起乎履止乎吳
此講學之序也語曰可與共學未可與適道可與適道
未可與立可與立未可與權夫人各有所履善惡分焉

惟能謙可與共學惟能復可與適道知所適而無以自立則莫能久故取諸常使久於其道或損之或益之至於因而不改若井未始隨邑而遷則所以自立者成矣雖然吉凶禍福橫發逆起有不可知將合於道惟權乎然非吳則權亦不可行學而至於吳乃可與權此聖賢事業也年方二十四其志趣學問如此久之赴華陽時宰秦檜知公名公不與通會詔郡國舉賢良公携五十策詣成都帥張燾不果薦秩滿外銓復直教授闕公亦

不就注嘉州軍事推官丁父憂二十年服除再注雅州
軍事推官作當直司箴諷郡守用私情背公法者總領
財賦符行中屬公增簡州監筭公移書力拒之舊相張
浚謂有臺諫風二十四年改宣教郎知成都府雙流縣
日坐廳事訟至立決前執政李文會自瀘徙益府下九
縣供張加倍公用常供李由他道去仕張氏子競家貲
公曰汝方在喪忍隆先訓盍歸思三日復來果悔過自
新大姓李雱市丘成之產業公以成之太白所生母追

正之零調辭訴府公列經義律文正零法豪右斂迹邑
庭如水日繙史冊彙次國朝事實謂司馬光脩史先為
百官公卿表十五卷後頗散逸乃徧求正史實錄旁採
家集野史增廣門數起建隆迄靖康合新舊官制成一
百四十二卷其重編尤者僅七之一長編之書蓋始於
此二十九年四川制置使王剛中辟公幹辦公事三十
二年知榮州州因山為城川為隍夏秋常患水溢公築
防禦之隆興二年除潼川府路轉運判官入境劾守令

四人州縣多橫斂公選官置局括一道財賦列其名色
使有無相補酌三年中數而為帳徧示官吏許摘不當
更定名為科約至今不廢母憂去官乾道三年召赴行
在八月入對上太祖故事乞為法請許六察言事又言
軍興三十年蜀賦一錢折變百文願自此勿增取況蜀
兵已多宜罷招募嚴簡汰禁大將毋張虛籍倍部曲孝
宗嘉納除尚書兵部郎中以父諱下行員外郎兼國史
院編修官又兼禮部會慶節上壽在郊禮散齋內議權

作樂公言漢唐祀天地散齋四日致齋三日我藝祖初郊亦然自崇寧大觀法周禮分祭天地故前卜日受誓戒今既合祭宜復漢唐及本朝舊制庶幾兩得照垂拱上壽止樂正殿為此使權用十二月正除禮部員外郎公言中興祭典未備岳鎮海瀆先農先蠶風雨雷師九祠以酒脯代牲牢近者雨暘失節郡國水灾殆或以此詔復舊古城國入貢依崇寧五年勅書用白背金花綾紙貯以金鍍銀匣公請如近例學士院謂禮部不當預

公曰典禮先有司部魚掌客豈侵官耶長編卷帙漸成
蜀帥汪應辰乞下臨安府給筆札繕寫藏秘閣公遂進
圖初至治平二百八卷特遷兩官公患時文衰弱乞令
考官取學術醇正切於世用之文苟涉虛浮必行黜落
明春省試勅榜戒諭上方厲精為治事或中出公輪對
言唐虞三代專以輔弼漢唐或謀卿士今捨二塗近習
必進此治亂之機惟聖明深慮過防盖有所指也又奏
省闈取士本不立額乞參皇祐四百之限稍加裁定舊

時奏名雖賜出身罕授職任近兩榜至八百五十餘人故選注官而賢良方正一件則寂無應詔當責舉者讀畢遂言天下有變經營北方未見可付之人上曰朕當自將公曰聖諭及此與真宗濟澶淵合矣上曰此朕家法太祖平澤潞取維揚太宗平太原皆是也公請先自治以待時上聳聽不倦近侍皆跛倚明日諭三省議省額特恩二事有沮之者乃已五年四月遷秘書少監太史言八月日當食公上疏具言灾異所以儆戒人主今

經筵不訪問言路罕論奏大臣無趙普補綴奏事杜衍封
還內降之風臣恐憂不在疆場惟陛下進衆正消羣陰
以應天變是冬並權起居舍人六年雷震上元後一日
公錄仁宗景祐三年正月甲辰求言寬賦斂二詔以進
直前乞刊定徽宗實錄之踈舛者因言臣方修進治平
後長編若就加討論它時可助正史詔復開實錄院四
月首命公為檢討官汪應辰進公子廩賢良詞業上曰
卿有子矣范成大除右史升攝起居郎議者誤引元豐

八年十月詔欲廢二浙保正止存者長又宰相以蜀人
帥蜀工部並除二侍武臣提點刑獄皆違舊制公援証
再三上曰卿論事根據極當朕心左相陳俊卿出知福
州右相虞允文既任恢復未免更張公言二典若稽古
夏有典則商云成憲周云舊章漢云故事子孫莫之敢
廢王安石變更法度厲階可鑑上欲除公兵部侍郎公
自攝記注數論事宰相頗不樂公遂請去六月除直顯
謨閣湖北轉運副使陞辭以欲速變古為戒為表禹貢

九州荆田第八賦乃在三人功既修遂超五等今田多
荒蕪賦虧十八上委公條畫至則言創耕憚科斂且畏
爭奪宜寬冒占廣激勸如太祖乾德四年許見佃者止
輸舊稅更不通檢詔如所請其妄執契爭奪毋受理守
令能勸課者賞之總賦呂洵問奏計公攝其職歲饑發
戶部大軍倉賑民僚佐爭執公曰吾自任責不以累諸
君請如教償之洵歸劾公專輒上令具析而已七年
庠中制科八年以舊官趣召會虞允文由左相宣撫西

川自詭北伐疑公異議預白上改直寶文閣帥潼川兼知瀘州首葺石門堡置戍以阨蕃人叙州舊市羈縻馬價頗平比歲增其尺寸償直不以時公言國計邊防胥失之乞戒茶馬司互市毋溢額仍勿於坤維禁山內伐木造船尋皆報可守邊踰歲淳熙元年被召適城中火公上章自劾既放罪矣提刑何熙志奏公不親至火所併指長編記魏王食肥羴語涉誣謗上曰此載皇宋事實何害止命成都提刑李繁體量大事公行及國門乞

祠待辨除江西轉運副使且許歸遣公進治平四年至
元符三年長編四百十七卷或勸公方被纒勿及時事
公曰聖主金度如此竭忠所以報也遂奏近者日食地
震外患內訌不可不慮又上快箴引太祖退朝悔乘快
事以諫上曰朕當揭之坐隅進秘閣脩撰旋坐火後不
盡書焚室貶秩一等而熙志以輒議史事削兩官公至
江西置一路財賦都簿以潼川科約未幾召還乞令本
路毋以臣去廢此書上曰卿不為高論務在便民甚善

擢秘書監權同脩國史權實錄院同脩撰蓋專付公以
史事故用侍從之禮三年正月也公前數言南郊明堂
均大禮自宜迭行適轉對申前說上令集議嬖近謂於
德壽宮有嫌沮不行及予為禮部尚書與諸儒議周成
王宗祀文王漢武帝陟配高祖所謂嚴父指周公也晉
唐及本朝名臣皆有是說非出於燾發之耳其議遂定
三月除權禮部侍郎賜服金紫七月壬戌雷震太廟柱
壞鳩尾有司隨加繕治公奏此非所以祇天變當應以

實上諭大臣燾愛朕屢有讜言公嘗謂正太祖東鄉條
上熙寧元符紹興議論其後率行之進四繫錄記女真
契丹起滅自紹聖迄宣和靖康凡二十卷上曰朕可一
日忘此敵哉九月兼侍講以經筵少開錄趙師民勸講
箴以諷并及仇士良不欲人主讀書近儒生之說會改
潛邸為祐聖觀璿璣殿於太一宮公密疏二千餘言上
褒答之四年春駕幸太學命公執經特轉一官堅辭不
聽公自郎署時已極論科舉及特奏名去冬乞依紹興

二十七年二月詔書用經義詩賦論策四場如元祐時
仍采蘓軾議量收恩科至是力請變文體取實學以致
人才上袖公奏付三省下學宮議國子司業鄭伯熊等
請如公言而老生晚學譁言不便議遂格八月真拜侍
郎仍兼工部徽錄置院久公荐呂祖謙為秘書郎兼檢
討官審訂增削數百條書遂成特遷一官或請升降兩
學從祀衆議不同第去王雱像用公說也元符接靖康
長編成上稱公無愧司馬光後有表云豫席恩言比迹

先正指此夜有宣引奏意者蒙氣蔽日厥占不肖者祿
股肱耳目宜謹厥與賜坐欲起上再留賜飲賜茶恩意
甚寵尋詔監視太史測驗天文公為郎時已言乾道新
厯不可用舉差失數十條詰太史局官皆無以對然卒
無知厯者公又欲叅酌開寶通禮政和五禮新儀為一
書雖下禮官亦不能成九月丁酉日當夜食公為社壇
發告官成鼓禮廢公舉行之先是屋入秘書為正字旋
魚國史編脩實錄檢討遷校書著作文字同典史事措

紳榮之公感上知論事益切每集議衆未發言公條陳可否無所避會近臣復舉公次子塾應科目黜於閣試
廬適考校上舍生發策云云為御史所劾語併及公廬
降一官罷公以本官知常德府初政和七年鼎澧辰沅
靖州置營田弓弩手司給田募人開邊范世雄張崇等
附會擾民建炎三年亟罷之乾道末守臣劉邦翰請復
行於辰沅靖三州公為轉運謂不當復已而提刑尹機
迫郡縣行之田不能給公至請度田額事不諧司公獨

約帥臣張拭具本上即從之境多茶園異時禁切商賈
率至交兵公曰官捕茶賊豈禁茶商聽其自如迄無犬
吠警六年丐開提舉江州太平興國宮是秋行明堂大
禮上以公首建議特除敷文閣待制頃之庠塾繼亡上
欲以吏事銷憂起知遂寧府用蔡挺涇原衙教法關勤
武堂親閱士卒其雜居市廛者葺營聚之七年史院進
四朝正史經脩官在外者例減磨勘二年宰執奏正史
頗採李燾長編地里一志又出其手詔減年外別轉一

官公自奉議郎年勞賞典積官朝議大夫避父名遇遷秩寄理者三於是轉通議大夫公以酒課加重奏權酤起王莽而成於德宗本朝郡釀有監司尚不許今乃設法勸飲以耗民財縱未能盡弛猶當用買撲舊法罷去官監上意鄉之而計司迫贍軍月減三十緡而已公節用度停燕官府肅然前得旨長編或有增損依照寧脩王經義法具奏至是上四千四百五十餘條又以一百六十八年事散九百八十卷一覽難周別為舉要六十

八卷總目五卷脩撰事目六十卷時召命已下公控辭
久之上數詢來期十年六月對延和殿適英閣方讀陸贄
奏議公撫贄言切今者數十事勸上力行且曰贄雖相
德宗其實不遇今可謂千載一時上曰惟不遇於當日
是以前言垂後世公又奏陛下即位二十餘年志在富
強而兵弱財匱與教民七年可以即戎異矣上有無功
業之歎公曰功業見乎變人事既修天應乃至上曰卿
宿德耆儒宜在左右任史職進敷文閣直學士提舉佑

神觀兼侍講同修國史七月久旱公進避殿損膳求言
故事上亟施行命侍從臺諫兩省卿監館職實封言事
趙彥中草詔云意者委任或非其人公奏陛下委任不
遇三四大臣神宗語富弼云唐太宗與魏徵議政事至
爭競宜勅二府以魏為法毋若元豐王珪號三旨相三
旨者謂上有可否珪曰領聖旨論軍國事曰誠如聖旨
啟擬曰取聖旨也又謂戶部不足南庫有餘請如唐建
中罷瓊林大盈庫歸左藏上以奏付外讀者失色丁丑

遂兩日一宣對公言外議陛下多服藥罕御殿宮嬪無
時進見浮費頗多上曰感卿忠愛然朕春秋已高安得
此聲近惟葵李嬪好用三萬緡無它費也上憂熒惑常入
斗公言天道遠惟正厥事可以弭災類次漢元鼎至宣
和四十五事以進十一月朔日當食心八分公曰心為
宋分為天王位潛陽將復陰氣乘之小人害政邊陲窺
中國之象復條上古今日食是月者二十四明日對延
和又及晉何曾譏武帝無經國遠圖上甚嘉獎是歲公

賦詩云明年七十吾歸矣預買北關門外舟至冬疾作
三省請給告十日上曰老者不以筋力為禮可半月十
一年春表乞致仕優詔不允上數問宰執公疾增損何
如萬里召來豈容輕去丞相王淮曰燾知進退宜從所
請上曰朕不幸有故於道路柰何可諭其鄉人給事中
宇文价留之价傳上旨公曰臣子戀闕非老疾忍乞骸
骨因詢价時事勉以忠義聞四川制置使留正總領馮
憲論減酒額猶手劄贊廟堂行之二月病棘甲子除數

文閣學士轉一官致仕命下喜曰事了矣口占遺表云
臣年七十死不為天所恨報國缺然願陛下經遠以藝
祖為師用人以昭陵為法辭氣安定俄卒上聞嗟惻賻
銀絹三百疋兩贈光祿大夫令臨安治後事沿江漕司
津置歸舟他日語宇文价曰朕嘗許燾大書續資治通
鑑長編七字且用神宗賜司馬光故事為序冠篇不謂
止此也公孝友誠實性無嗜好惟潛心經史有易學五
卷春秋學十卷故其出處本於潔淨精微著述則評論

今古別白善惡得褒貶之旨所至求與篇隱佚傳錄讐
校雖陰陽卜說亦無遺者家藏積數萬卷為文語道而
理備考蜀類試叅詳南省多得名士薦人輒削橐前兩
入朝適虞允文暨趙雄當路士大夫爭談兵二公皆蜀
人雅敬公公一無所詢晚在經筵人頗懷安公為上前
日紛紛今日默默俱非自治其持論不隨時類此公著
五經傳授尚書百篇圖大傳雜說七千二子名籍各一
卷文集五十卷奏議二十卷四朝史稿五十卷通論十

卷南北攻守錄三十卷七十二侯圖陶潛新傳并詩譜
各三卷歷代宰相年表二十三卷唐宰相譜一卷江左
方鎮年表六卷晉司馬氏本支齊梁本支王謝世表五
代三衛將帥年表各一卷本朝事始兩卷建隆遺事辨
趙普別傳科場沿革集賢學士并賜帶典故各一卷范
韓文富王歐陽司馬三蘓及六君子年譜各三卷明年
七月己酉即葬吳巖之陽妻碩人楊氏同邑贈朝散大
夫素之孫黃庭堅為記大雅堂者後公八年卒祔焉七

子謙早死，屋終奉議郎，主管成都府玉局觀，至今為朝請郎，權發遣忠州，塾終承務郎，岱亦亡，壁臺皆登科，壁今為朝散郎，權發遣漢州，埴承議郎，主管華州雲臺觀六女，均適朝散郎，知果州曹執中，坑適朝奉大夫，知崇慶府師祖慶壇，適文林郎漢州州學教授闕，阜典適薛紘，穎增適承議郎充雲安軍使，兼知縣事張仲堪，適朝散大夫利州路提點刑獄公事范子庚，孫十一人，鎧宣義郎錫脩，職郎彭州九隴縣主簿，鑑鍊，鋌，周，鋤，鏹，銓，積。

簡其三今亡錄周鑑也孫女三人長馴早夭次真適修職
郎孫綱闕不在從適迪功郎新雅州盧山縣簿尉劉成
季曾孫十一人公爵丹稜縣開國伯食邑七百戶諸子
升朝贈少師而贈楊氏福國夫人銘曰

尚書記言春秋書事經別以六史居其二漢太史公儀
尊相臣我朝大典亦歸宰庭時政有記起居有注東觀
石渠諸儒所聚設官分職上下相維合力纂修猶懼闕
遺公生遐方初筮州縣間於期會屈首銘槩祖功宗德

業鉅事叢政有因草論多異同禮樂制作窮邊荒服原
始要終咸舉綱目三入承明迄用奏篇帝擬以光士推
如遷問胡云然多聞直諒舞禮文姦視若仇敵以此事
君忠讜不欺出而臨民敬簡無私赫赫榮名番番壽考
慶流子孫殃則何有螭首龜趺刻以銘章申勸剛者公
為不亡

文忠集卷六十六

欽定四庫全書

文忠集卷六十七

平園續稿二十七

宋周必大撰

神道碑七

敷文閣學士宣奉大夫贈特進汪公

大猷

神道

碑 嘉泰元年

子夏曰死生有命富貴在天是謂格言雖然仁者多壽
賢者多貴則有人事參焉今敷文閣學士汪公年開九

秩官職皆三品爵二品殆仁賢之驗也公諱大猷字仲嘉慶元府鄞縣人曾祖元吉以廉平吏受知范文正王文公妣何氏祖洙號儒先本州助教贈正奉大夫妣碩人陳氏父思溫歷兩浙轉運副使太府少卿終左朝議大夫直顯謨閣累贈少師妣越國夫人王氏四子公其仲也四歲對客誦孝經止十七章或問末章以具慶對客異之八九歲述先生口義示同舍十餘歲賦詩可觀紹興七年少師遇宗祀奏補將仕郎起家右迪功郎衢

州江山尉十五年登進士乙科夏大水括鹽舟濟避溺者又發廩為糜食之州符捕來暮鄉魘賊公曰賊有無尉豈不知第呼菜食二人杖遣之監司交荐陞左從事郎移婺州金華丞與民期限必信人亦信之豪族陸氏爭產久不決公曉以恩義悅服而退戶部侍郎李椿年行經界法量田不實罪至徒流檄公覆視龍遊縣公曰法峻民未喻固有田少而供多者願許首復改正又謂每保圖頃畝林塘十保合一人圖用紙二百番安所

展視李聽其言輕刑省費為多二十年丁內艱二十三年再承嚴州建德用舉主改左宣教郎知平江府崑山縣未上丁外艱二十九年辟顯仁皇后攢宮屬官訖事為淮西江東軍馬錢糧所幹辦公事三十二年孝宗受禪自左叅議郎轉承務郎賜服緋銀入幹辦行在諸司糧料院隆興二年敵寇邊錢簡肅公端禮宣諭淮辟幹辦公事遷太宗正丞陸叅議官歷左朝奉朝散郎錢公執政乾道元年兼侍右郎官又兼戶部右曹六月輪對

乞數名實責任臣下量能授官毋違所長擢禮部員外郎仍兼侍右九月遷尚左郎官莊文太子受冊兼左諭德仍侍講二年省試充叅詳官六月遷秘書少監首率館職續編國朝會要高宗聖政成書轉左朝請郎三年冬假吏部尚書接送伴金國賀正且使四年兼權刑部侍郎又兼崇政殿說書夜直數宣對會遣御史決獄畿縣公言其擾謂委倅貳台民楊大任縛所藏盜赴朝希賞政府疑之公曰舍匿罪未發而能慕賞執賊若坐以

赴訴無復告捕者矣上皆然之宰掾言太祖朝強盜不分首從不問殺傷併贓滿三貫者死景祐勅增至五貫固已從寬今設六項法非手及人例奏裁黥配何所懲艾請從舊法詔侍從臺諫集議公言賊知必死將甘心於被盜之家故稍開其生路後迄不改暫權給事中公以中興修法已四十年積續降二萬餘條乞從刪定詔委刑部大理長貳及僚屬掌其事而以公兼重修勅令詳定官五年再叅詳省試轉左朝奉朝散大夫四月正

除權刑部侍郎外侍講上諭公既為從天下事皆可論
朕每厭官官宮女之言數延見經筵官自今朝政闕失
民情利病勿惜盡言公奏前後臣僚論事衆矣未嘗薄
錄何以考其行否宗室非獄祠則員外置離軍及歸正
官多不釐務何以顯其才能兩淮多曠土宜置力田科
募江浙富民自以耕夫牛種開荒苟有成效特補官凡
配隸人亦聽授田雜耕又言賊吏及囊橐盜賊者財產
沒官可也若倉庫綱運欠折而無弊貴償苟足合歸其

業不^闕斥賣或賜勲戚州縣私立稅場擾及行旅鄉坊

捕灑如治大辟願加禁止上嘉獎曰卿所陳皆可行有
用之才也選充金國賀正旦信使六年使回轉左朝請
大夫上方經畧中原將命者多縱吏之上以諭公公謂
敵法嚴整上曰未可圖耶公頓首曰誠如聖訓姑修人
事以俟天應閏五月兼權吏部侍郎進續會要轉左朝
議大夫六月改權吏部侍郎尋兼尚書轉左中奉大夫
十一月勅令格式進書增損元文五百七十四帶修創

立三百六十一刪八十三留以照用者百二十有八公

用力為多轉左中奉大夫上嘗問黜陟闕卿職者有過

差否公言溫台水災守臣王之望陳巖肖以前執政從

官放罪而二漕削官知信州趙師嚴補前守移充常平

米反以擅用鑄秩毋得親民提舉官李庚已付隣郡推

治乃坐不檢察罷勿與監司上並許改正公蚤侍少師

郎銓曹耳熟清通暨歷三選力破有司從窄之論迨兼

長貳益得行志大夫爵滯頓伸法或不可明以告之辨

宗室及陣亡人女夫奏薦不當入七色恩科選人乞休致許用嶽廟歲月理權入官之考命官公過非經勘正勿關刑寺注簿凡案後收坐者就部原赦結絕存心之仁類此上下翕然賢之郊裡差五使宰執不脩待命公充鹵簿使有忌之者禮成不自安請去七年正月除敷文閣待制提舉江州太平興國宮侍從館閣分韻賦詩以錢四月起知泉州海中大洲號平湖邦人就植粟麥麻有毗舍耶蠻揚颿奄至肌體漆黑語言不通種種皆

為所獲調兵逐捕則入水持其舟而已俘民為鄉導劫掠近城赤嶼洲於是春夏遣戍秋暮始歸勞費不貲公即其地造屋二百區畱屯水軍蠻不復來久之戍將貪功妄捕真臘大商兩舟至庭公辨而遣之左翼軍列寨郊外軍人夜踰城盜金庫為邏卒所執反誣卒為盜公得其實主將懼罪爭辦公畀軍中自治之舊例蕃商與華人鬩非所傷聽贖公曰既在吾境當用吾法爭鬪用稀詔許三佛齊寄銅造丸公奏在法銅不下海且中國

方禁銷鑄奈何為邊人所役卒不與閩地狹田少歲積
廣米每患客舟不時至入籍上戶航海者出錢數萬緡
貸之使糴於五羊比歸損價以糴官收其本子與其入
南外宗子初纔數房久益蕃衍廩給不足而僧田多戶
絕豪右增租爭佃公論見佃人若受所增最高之數歲
以輸官聽如其舊佃戶樂從宗子月給遂足九年進敷
文閣直學士再任就賜衣帶淳熙元年轉大中大夫請
祠六月再提舉興國宮江西謀帥道隆興府赴闕臨遣

甚寵吉州龍泉縣豪民王氏父子驚爵怒武尉驗田不
如欲集少狙擊折足州不能治移鞠傍郡猶不承公與
諸司具奏決配嶺南人皆快之二年湖北茶寇賴文政
轉剽湖南入江西據永新禾山洞公遣宿將賈和仲帥
師討之和仲輕敵敗衄六月詔公節制軍馬賊短兵輕
甲一晝夜馳山谷二百里官軍困追逐公曰技有長短
不可強也分兵遮道賊蹙欲降公與提刑辛棄疾議遣
興國尉黃倬持檄招諭而公先自劾和仲喪師七月降

龍圖閣待制又降集英殿修撰罷帥事十月落職南康軍居住而賊迄就降誅之始公使北曾覲為介頗疑簡驩至是方下石逞恨云再暮方許自便後八年乃提舉興國宮十三年德壽慶典還龍圖閣待制轉通議大夫明年再任十六年正月改鳳翔府上清太平宮光宗尊恩轉通奉大夫紹興元年復敷文閣直學士十二月磨勘正議大夫二年以正奉大夫致仕今上位遷正奉大夫詔書求言仍賜銀盒茶藥慶元五年冬優禮老臣特

升學士賜衣帶鞍馬六年七月庚辰以疾薨年八十一
遺奏聞贈特進妻碩人同郡樓氏先二十七年卒三子
端中奉議郎兩浙西路提舉常平司幹辦公事賜緋魚
袋立中宣教郎知婺州武義縣丞儀中受遺澤四女三
早夭一適奉議郎知福州永福縣樓鏐再適脩武郎東
南第六副將趙善琮孫男四人之翰承奉郎監嘉興府
華亭縣市舶務之幹之輔之範孫女七人長適迪功郎新
臨安府臨安縣尉裘得宜次適沈楷通仕郎趙樽王元

恭餘未行曾孫女二人先是碩人葬慈溪縣石臺鄉龍潭之原十二月丙申公合葬焉爵自奉化縣開國男積封本郡公食闕通二千五百戶闕百戶公立朝盡

心職業深為孝宗所知雖與史丞相浩同里同年魏丞相杞少相從蔣丞相希並為儲僚而公恬於進取一無

附麗中間

闕

南康有言公者公笑曰某年踰五十若以

恩科入官得尉星子不賀我乎客聞歎服杖履往來廬山和陶令歸去來辭觴客則歌之還鄉十五年踰七十

即納祿又十年兩值登極應詔陳治道各數千言八十
被優異之恩女兄樓夫人長公十歲亦封郡夫人兩家
賀賓盈門燕集者累月士大夫榮之少師天資仁厚常
曰事事方便物物利益是吾志也公推廣力行始終不
怠莫少師後祈常產遺兄弟公以四之一獨任百費竭
力營家舍有餘亟作無則暫輟閱再歲乃成女弟三人
俱得所歸遇大禮三陰其姪今諸孫尚白丁性樂施宗
姻緩急皆歸之著興仁錄示子孫四明風素厚公割田

二十畝創立義莊欣慕者衆積至三頃郡守林大中助以絕產二頃擇鄉官主之遇士族清貧者家有吉凶各為限制隨事白郡郡下莊第給遂為無窮之利府學當葺公自任儀門又為文勸有力者不日而新冬元日集鄉士行禮大成殿下退序拜明倫堂歲長鄉飲推長者祭酒自齒韋布之列凡里中義事悉為主盟不喜飲而喜延客坐上常滿各得其懽心平居慕白樂天為人未六十即退閒以適名齋宜靜名室時作歌詩平澹造理

從容二十有五年庶幾樂天之出處壽則過之立朝好
延譽後進識樞密葉公翦於掌故之中交游如錢尚書
象祖劉侍郎孝遹史待制彌大都司潘時屯田鄭鏐簽
判沈銖推揚汲引惟恐不及晚尤篤學抄書如少年有
適齋存彙二十卷備忘十七篇唐宋名公詩韻四十編
併漫錄訓鑒等書藏於家予昔與公同朝相好也去夏
書未酬聞公計諸孤遠求隧道之碑而翰林尚書樓公
鑰復示公行實且曰吾母年將期頤哭弟不勝哀況於

其甥願賜之銘以慰存沒乃為銘曰

惟古賢者匪懈為仁衆欲汎愛均焉無貧獨與汪公後
已先人倅佐三邑已勤利民翔於禁塗謀告力陳司寇
枉直典銓滯伸苟可澤物心無踈親歸哉二紀壽祉交
臻肆推緒餘施及鄉鄰既昌其詩亦榮其身仰止香山
逝將擬倫刻銘豐碑永世弗湮

資政殿學士宣奉大夫叅知政事蕭正肅公

燧

神道碑

嘉泰元年

庶民美宣王任賢使能周室中興孟子曰賢者在位能者在職此服休服采之辨也孝宗皇帝實兼用之當是時經武理財期摠高文之宿憤差擇能臣比肩於朝惟故叅知政事蕭公靖共正直簡在上心未嘗談兵言利而徧歷要劇兼贊鈞樞異乎效能於一職者嗚呼孝宗可謂善任賢者可謂進以德矣今公之子以里人工部謝尚書謬所狀行實請碑墓道予與公居鄰邦仕同朝晚復共政其何可辭公諱燧字照隣先世唐望族散居

潭之瀏陽南唐時徙袁州新喻縣今隸臨江軍高祖集

賢殿脩撰

闕

天聖進士皇裕初為廣西轉運使知儂智

高允孜教條上羈縻之策樞臣沮之智高果作亂反坐

失察降知吉州嘉祐中帥桂林消患折衝為多王文公

安石志其墓曾祖某官贈太子太保諱洵妣河南郡夫

人張氏祖朝散郎通判江州贈太子太傅諱鎰妣東萊

郡夫人趙氏東海郡夫人陳氏父贈少傅諱增母鄭國

夫人陶氏繼母許國夫人李氏紹興初復制舉少傅用

近臣薦至闕請闢言路宰相不悅罷歸教諸子以學公
獨穎異幼能屬文十八年進士第五人授左從事郎平
江府觀察推官郡守李朝正號剛嚴僚吏畏縮公遇事
別白是非朝正敬焉秦丞相檜親黨密語公曰秋試必
主文漕臺公詰其故則曰丞相有子就舉將以屬公公
怒曰某初任敢欺心耶漕檄下乃秀州也至則員溢就
試院易張教授者云秦熈果前列初公未第夢神人示
文書中一聯云如火烈烈玉石俱焚在冬青青松栢不

改至是秩滿當官上庠公徑赴部調靜江府察推地闕
俱遠蓋知秦怒且信前夢也高宗更化垂名丁許國憂
三十二年服除堂擬太學博士闕殆十年公復注靖州
教授考滿改左宣教郎孝宗初年錢公端禮虞公允文
同執政求中立不倚之士差公諸王宮大小學教授乾
道五年供職輪對論官當擇人不當為人擇官上喜因
御製用人論賜大臣六年除太常府寺主簿進太常丞
郡臣爭畫策恢復公因對言漢高祖取項籍奇謀秘計

史不得書今自治未效而大言釣美官者紛紛謀國亦
踈矣上然之公自登朝出公門入私門率數月隨衆一
至政府未嘗有所求上察其賢七年擢將作少監八年
兼權司封司勲郎官九年進擬軍器監王音以為允諸
公益知上眷俄兼太子左諭德淳熙二年遷國子司業
時舉德壽慶典生員爭挾貴要求為大小職事覲霑霑
恩公興祭酒蕭之敏靖立格選差至今守之九月兼權
起居舍人越三日復權中書舍人直前奏謝上曰卿質

直無附麗故加親擢三年三月進起居郎先是察官闕
朝論多屬公上以公不歷縣為礙格十二月起拜左司
諫首言辨邪正然後可為治上及外臺耳目多不稱職
公疏二人乃大璫甘昇都承旨王抃所主上即罷之一
日復宣諭兩郡守不職公則辨其無他其不阿類此每
對必言民力困窮冗費不節宜立經制量入為出又州
縣官冗增負未已數放逋負有名無實守令勸農反為
農害京西不當益武憲輔郡不應用武守獎拔宜先循

良後能吏上皆行之時中外無慮歲事屢置議者復及
進取上以問公公曰賢否雜揉風俗澆浮兵未強財未
裕正宜卧薪嘗膽以圖內治若恃小康萌驕心非臣所
知上曰忠言也公因勸上正紀綱容直言親君子遠小
人近習有勞可賞以祿不可假以權上甚嘉納四年冬
擢右諫議大夫入謝上曰卿論議鯁切不求名譽糾正
奸邪不恤仇怨故制詞謂善不近名仁必有勇道上意
也五年同知禮部貢舉有卿監暫權工部侍郎被酒自

詫出曾覲之門公奏黜之夔帥李景享恃援貪虐臺臣不敢劾公極力論之趙叅政雄奏公誤信景享仇人令狐某之言捕治其人公併及趙上不得已閏六月從公刑部侍郎懇辭不聽固請補外九月出知嚴州吏部尚書鄭丙侍郎李椿皆謂公不當去上亦悔之嚴地狹財匱始至庫緡不滿三千公儉以節用不二年積至十五萬緡淳安縣務加額公付縣充版帳且為豁積欠數千緡屬邑俱寬先是宣和庚子方臘盜起甲子一周衆方

疑懼適遂安令朶土兵廩給羣言沟沟公亟易令且呼
卒長告誡皆感恩畏服城中惡少數輩間擾市廛公
密籍姓名湮補軍額人以按堵庭無留訟監司言狀上
方靳職名非功不予詔公治之有勞特除敷文閣待制
移知婺州父老遮道幾不得行其送出境者以千數婺
與嚴隣熟公政不勞而治會歲旱浙西常平司請移婺
粟於嚴公曰同路則可今東西分部不當與然舊治安
忍坐視為請於朝上發太倉粟賑之八年冬召還公言

江浙再歲水旱願下詔求言仍命監司通融郡縣財賦
毋但督責而已除吏部右侍郎旋兼國子祭酒近例知
閣官兼樞密都承旨或怙寵招權上思復用儒臣九年
正月命公以龍圖閣待制為之公言債帥餘風未殄羣
臣進言非迎合獻諛則強辨邀譽當察誠偽虛實上稱
善八月除權刑部尚書北使賀正旦充館伴使十年兼
權吏部尚書明年兼侍講十一月真拜秋官典銓如故
俄升侍讀公言命令不可數易憲章不可數改初官不

許恩例免試今或徑令注授既却羨餘之獻今反以出
剩為名諸路錄問大辟長吏當親詰以防吏謾死囚數
多乞如漢制殿最以問事多施行慶典丁錢減半亦自
公發之經筵讀陸贄奏議至度支折稅市草事公奏聚
斂之臣欲為欺誕必更制度如桑弘羊幹鹽鐵宇文融
括剩田皆陰耗元氣上曰制度何可紛更天下本無事
庸人擾之耳又讀論裴延齡書畢奏曰人君未嘗不欲
去小人然君子常為小人所勝蕭望之困於恭顯在漢

元帝不足責如唐明皇憲宗號明主而張九齡不勝李
林甫裴度不勝皇甫鎛蓋小人善以智術惑主聽上曰
小人須挾才鎛亦延齡之徒也公曰贄賤在貞元十一
年明年而延齡死殆非人力不然延齡相矣贄之言可
為萬世戒上極稱善十三年七月正除吏部尚書十四
年因早求言公列十事以進高宗山陵充按行使明年
正月遂貳大政尋充思陵禮儀使畢事進官二等按行
賜銀絹五百禮儀又五之二並固辭不受五月權監修

國史日歷十六年正月兼權知樞密院事倚注方隆而
公自陳年至除資政殿學士與郡復請間改提舉臨安
府洞霄宮辭日上有勉從卿去之語光宗即位詔書求
言公手疏六事語甚剴切表乞休致優詔不允以紹熙
四年二月二十五日薨明年十月己酉葬本縣鍾山鄉
上靈之原享年七十七積官宣奉大夫封豫章郡開國
公食邑至二千一百戶實封三百戶特贈金紫光祿大
夫娶同邑張氏某之女封大寧郡夫人通古今有賢行


三男達某官進士唱名第四孝宗咨賞他日入謝上曰
達才氣甚佳父子高科殊為卿喜遵某官兄弟皆賢而
文其一天五女長不及嫁次適某官趙師烜前卒次適
某官趙師燭次適某官劉若次繼室師烜孫男三人彖
蒙承奉郎一尚幼公資性端醇問學精博持身玉雪論
事金石聲色財利無所徇飲奕服玩無所好接物雖和
然不可干以私常曰士大夫操履正乃能守道守官若
內有毫髮之愧臨事必掣肘古人謂受恩多難立朝諒

哉惟其所得如此故安恬不競人不得而親疎孝宗深知之每稱其全護善類誠實不欺御書二十八將傳論以賜公之言事或有未契必反復開陳退未嘗漏言薦進人才不市私恩在從班奉勅舉察官以今三衢丞相余公應詔上即用之其精鑒如此高宗初喪上未見羣臣首引公及翰林學士洪邁語頗傳外公尋得政上對二府及之面獎公曰叅政周密必不洩也始終倚信豈偶然而已立朝三十年苞苴不至其門退歸鄉閭蕭然

如寒素自號定齋居士闢小圃粗立亭館藝花竹制度
極簡朴鄉人名曰南園晚康強無疾其終也適清明薦
享家廟退與子孫論文如常時有頃微倦就枕奄然而
逝文集五十卷奏議二十卷外制五卷經筵講義二卷
東宮講義五卷以子升朝遇恩累贈某官銘曰

古先哲王真賢是任任之伊何必親必信惟是良臣以
德復君其德伊何必忠必誠明明孝宗如日有赫溫溫
蕭公韞玉之質帝曰汝文其代予言又曰直哉以繩我

愆迪簡疇咨爰授之政東府西樞兼幹二柄以輔以翼
謀焉孔嘉有始有卒音則不瑕帝倦於勤公亦歸止燕
穎故鄉綏厥壽祉譽望之成似續之興以貽來世不在
斯銘



文忠集卷六十七

欽定四庫全書

集部

文忠集卷

六十八至
七十一

詳校官庶吉士_臣李傅熊

主事_臣呂雲棟覆勘

總校官進士_臣楊懋珩

校對官學正_臣李巖

謄錄監生_臣黃嵩齡

欽定四庫全書

文忠集卷六十八

平園續稿二十八

宋周必大撰

神道碑八

丞相洪文惠公追神道碑

嘉泰元年

公姓洪系出共工氏後避仇以洪易工三國有廬江太守矩唐有集賢學士孝昌五季自歙徙饒州樂平又七世始歸鄱陽隱德田間至公高祖士良力教子孫學愛

滄菴山而置倉焉命其子曰他日葬我倉下青紫當不絕後十六年元豐乙丑孫彥昇果以進士起家事徽宗歷三院御史至給事中徽猷閣待制遂為大家公之曾祖諱炳贈少保妣紀國夫人何氏祖贈太師鄭國公諱彥先給事弟也妣魯國夫人董氏徙樂平之洪源父皓政和乙未進士仕至徽猷閣直學士贈太師魏國公謚忠宣母魏國夫人沈氏公初名造字溫伯一字景溫後改名造字景伯幼穎異日誦書三千言忠宣公自嘉禾

司錄應選使朔方公年十三已能任家事率五弟三妹奉祖母及母避亂歸饒母亡復過嘉禾食忠宣之祿日夜率長弟文安公遵次弟翰林學士邁種學績文至忘寢食用父出使恩補脩職郎監南嶽廟調嚴州錄事叅軍浙西提舉常平司幹辦公事紹興十二年與文安公同博學宏詞科宰臣進呈所試制詞高宗曰父在遠子能自立可嘉宜與陞擢遂除勅令所刪定官後三年翰林公亦中選由是洪氏文名滿天下改左宣教郎入秘

書省為正字才數月忠宣公歸自朔方以忠言忤秦丞相檜斥補鄉郡公亦出通判台州將滿而忠宣公散官謫英州台守觀望擬彈公文納當路轉示言者以為風聞公免官往來嶺南供子職閱九年秦薨忠宣北歸亦道卒服闋起知荆門軍公才智有餘臨民惠愛二十八年應詔上寬恤四事凡公私以例取民錢歲數千緡悉除之郡久為盜區大比士附江陵試解額僅存五之一公作成日衆乞自闕試闡稍還舊額繼有登科者改知

徽州會驚官田監司皆敦迫州縣公獨寬之初至訟析
產不平者紛然公曰此吏求賂不印關書之過也命人
戶毋問早晚齎書庭下為立印給其訟遂絕為政得要
類此范文穆公成大來為戶掾一見知其遠器勉以吏
事暇則商榷著述自是范公官業文筆高一世每德公
云擢提舉浙江西常平茶鹽會文安公守平江易江東
路常兼提點刑獄蓋鄉部也持正不私風采振厲三十
二年車駕視師金陵公因朝覲言本路昨旱荒民逐食

淮甸復因敵兵今雖懷歸而田產官已斥賣不則給佃
乞斷自二十八年後許業主若子孫用估價贖還天語
褒答再三時翰林被命迎使客上曰洪皓三子皆可用
也公於是歷陳邊防民兵積粟賑民等事朝廷益知其
才除尚書戶部郎中總領淮東軍馬錢糧孝宗即位海
州解圍符離用兵供億繁夥心計周密暇裕如平時會
有旨犒海州之師鎮江及武鋒軍有實在圍中而不與
名公比附倍給以便宜招納海道逃卒歸之督府歸正

者接踵而來或無以贍其家因公奏乃計口添支公謂
官以總領淮東為名而財賦實隸浙江西東乞以兩路
入銜後公登二府竟行其說迄今便之隆興元年就遷
司農少卿明年召貳太常兼權直學士院又兼權禮部
尚書上初講郊祀公必進胙德壽宮及改定樂章汰樂
工冗員人謂禮與時兩得之七月文安公罷西府公即
求去上遣使賜茶諭令安職尋因夜直同右正言尹穡
召對上稱公溫粹文詞有用論事可觀穡先頗睥睨公

知上眷乃已九月除中書舍人內直如故湯丞相思退
免侍御史晁公武論公草麻無譴責語公亟請外上曰
公武言卿黨思退朕謂平調出朕意固却其章仍徙戶
部侍郎矣方羽檄交馳書詔填委或夜召或細札咨訪
公獨當內外制時時奉詔言事如乞防虞海道降詔親
征多契聖心大用之意已定敵既講好首命公為賀生
辰使敵遣同簽書宣徽院事高副先接伴自言其父司
空有德忠宣相與甚歡得其要領以歸乾道元年五月

除翰林學士仍兼中書舍人大臣奏翰苑不應下兼按
垣上曰洪某在後省振職欲其整頓綱紀耳秦壻子祠
公執不可上徑批依奏封以付公明日賜對宣諭曰卿
論秦壻甚當雖朕意所向不可行者第言之巫伋被召
余堯弼復職莫汲為密院編脩官公皆繳奏而止又奏
免外制上曰執政有闕朕將用卿公因繳馬監崔良輔
轉官乞令大臣討論賞典上極稱善且曰卿且執政自
可討論六月遂除端明殿學士簽書樞密院事上諭恭

政錢端禮虞允文曰三省事與洪某商量東西府始同
班奏事公赴德壽宮謝高宗曰上議用卿吾謂從官中
無踰卿者况卿父精忠古今所無頃欲登用阻於秦檜
今卿兄弟相繼入輔此天報也八月以左中大夫叅知
政事十二月轉通奉大夫尚書右僕射同中書門下平
章事兼樞密使公自簽樞旬月入相感激異知任怨草
獎以誠實不欺為主人才可用疎遠不棄不然雖親舊
弗予上每稱其心存公道進擬無不當公奏中書舍人

蔣芾語臣無事可繳臣答云凡降旨云特者皆非法今一切無之上曰芾亦及此且謂特旨宜審公奏陛下動遵成憲願思芾言益崇聖德上曰朕與卿等共守之駕幸白石教場閱三衛軍馬公前奏將帥有潛蓄鷹犬備狩獵者上即呼諸將戒諭初議召見郡守觀其能否公言舊惟見闕賜對今乞勿拘闕遠近並令半年前奏事之任遂為定制二千石多得人矣公自執政即奏減機速房吏三省密院毋謂額外人有承旨司謝褒者力乞

存留四人某子在馬公怒取旨編置政府久不治吏上欣然以為允戶部事有稽慢公追主令治之侍郎林安宅上章請罪既又欲給度牒闕道付廣東期一季盡鬻公請減半仍戒科擾安宅滋不悅馬軍司乞牛皮五千餘為馬甲御前拋買五萬工部別得旨市十三萬公奏數多限迫上曰軍器所妄計是使人殺耕牛也第買一萬而已中批未彥宗知婺州公言此資善堂翊善朱震之子雖可與郡然彥宗娶潘氏乃婺州長公主家遂改

泰州二年殿中侍御史張之綱論陳宗霖當與差遣而
潛附所厚華初成於是公發其姦上視初成履歷曰屢
放罷又嘗停官其年已及豈應與郡卿敢及臺諫可見
無私朕終夕為之喜劉貢初除監察御史公贊上得人
會術士薛言中同貢子為人求官於樞密使汪澈汪送
有司上未知也早朝上稱貢治能錢唐寄囚已批出還
殿中公與執政及薛言中事且云除書未啓當封還上
曰卿等如此無隱向來宰執所無之綱尋以憂去貢遂

罷方士皇甫坦謁公公薄其禮坦怒公公責之曰君誠有道胡為出入宮禁妄談禍福耶明日公奏通國以神仙待坦陛下謂坦何如上已知公責坦笑曰頗能理氣治病昨日宮中賜酒醉語已無倫矣公既疊忤言路適林安宅為諫大夫或勸公引避公曰吾與安宅異同國事也上知吾忠豈可患失逆為去就乎適春霖公引咎乞退上曰春自多雨卿第安心安宅遂與臺官合辭論公上不聽安宅至家居待罪公亦請力上不得已三月

辛未除公觀文殿學士提舉江州太平興國宮而謂叅
政葉顥曰宰臣奉法守公誠實不欺無如洪某重違言者
耳不數月起知紹興府浙東安撫使治得大體復勤小
物軍民安之閱歲有半提舉臨安府洞霄宮時翰林在
西掖上語之曰賢兄三請祠姑聽暫閒公素不營產業
自越歸得負郭地百畝因列闕雙溪之勝位置臺榭引
水流觴種花藝竹命曰盤洲一椽一卉題詠殆徧安居
十有六年身名俱榮子孫滿前近世徧福鮮及公者淳

熙十一年辛酉薨於正寢前自撰遺表上之享年六十
有八爵鄱陽郡開國公食邑五千二百戶實食封二十四
百戶初贈特進諸子遇恩累贈太師魏國公娶沈氏太
學博士松年女追封魏國夫人母夫人姪也先公五年
薨葬郡東闕四十里徐村之源公為墓銘效漢人立雙
闕因自作小傳俾後人刻其上明年三月甲申諸子奉
公柩合葬焉男九人長闕朝請大夫新知贛州江南西
路兵馬鈐轄次秘朝請大夫新知南劍州掾早亡楸朝

散郎新權發遣長寧軍攢朝請郎前軍器監主簿桴故
承事郎榘朝奉郎新知慶元府定海縣榦早亡相通直
郎前權簽書荆門軍判官廳公事女三人長早卒次適
通奉大夫同知樞密院事許及之子前卒次適朝散大
夫兩浙西路提點刑獄公事薛紹孫二十三人倬承義郎
江南西路提點刑獄司幹辦公事儼故承事郎知常德
府龍陽縣丞及奉議郎荆湖南路提舉茶鹽司幹辦公
事偲承事郎新知江州瑞昌縣係承事郎新提領建康

府戶部贍軍酒庫所幹辦公事僑俟侃承務郎新監建
康府戶部大軍庫門僊承事郎新權簽書漢陽軍判官
廳公事傳將仕郎佃佃仔俅儉儔承事郎親監無為軍
崑山鎮伉俊仁俶承務郎倣倣女孫十二人適文林郎
前廣南西路轉運使主管帳司楊闕明脩職郎新無為
軍巢縣主簿權當國通直郎兩浙東路提舉常平司幹
辦公事張履信鄉貢進士陳洋承務郎張闕將仕郎邢
鄂將仕郎王待問進士高闕迪功郎新信州弋陽縣尉

王元春餘在室曾孫男五人希蘊蘭將仕郎遂荀女一
人公器業早成與人誠實無浮禮文華天賦濟以力學
步驟經史新奇富贍兄弟鼎立自成一家罷政後論著
益多四方傳誦有盤洲集一百卷耽嗜隸古為纂釋二
十七卷隸續二十一卷屢加刪潤合為一書將踵歐陽
文忠公集古錄趙明誠而下弗論也某早與文安及翰
林同朝公由常平入對始識公又嘗與贛州為僚金陵
故其子孫以副樞許甥狀請碑墓道先是太常以文惠

易公名文固然矣壬辰夏子奉祀過饒適連年水旱流
移系公道宗文繁庶或不自給人人言相君賙我且及
恤貧已責事甚詳夫家居均惠若此在公固可知矣遇
蔭補捨長孫密奏表弟沈自強酬渭陽之恩命下乃知
是皆宜書銘曰

思文孝宗雲漢章天有臣洪公優於代言孝宗神武思
復疆土公踐帷幄言整軍旅帝方克勤如日運行公總
衆職甚稱上心帝推至公天無私覆相業伊何才能是

授謀皆予同德惟乃知周旋二府僅越三時保釐東郊
注想末智歸心浩然何待奉計榮名燕居十有六年為
而不恃五福天全熒熒斯文振振厥後詩以聲之公乎
不朽

左中奉大夫敷文閣待制特進林公保神道碑

嘉泰二年二月

高宗皇帝既通好強敵思與兆姓休息擇端良學識之
士布列庶位故敷文閣待制四明林公行安節和特被

簡知久貳制官引疾奉祠考終於家其葬也鄉老何寺丞涇嘗狀其事實而出處行誼則載實錄惟是墓道之碑闕而未脩後五十餘年其孫都大提點坑冶鑄錢祖洽以使事過廬陵謂某嘗官太師夙知公賢且契好不薄固以為請久之乃克如約惟林氏出殷比干比干既沒子堅逃難長林遂命氏焉晉永嘉亂渡江家泉南至本朝為今慶元府鄞縣人曾祖復祖彥臣父延之俱不仕父以公貴贈正奉大夫公諱保字比民政和二年登上

舍第調迪功郎舒州宿松尉兩從廣西帥辟主管機宜
文字是時方郡縣蠻境將士稍俘平民冒賞公覈正之
全活為多武吏注闕泛濫公為立三等校試法改奉議
郎南丹州策勲擢本路提舉常平或疑資淺改倅桂州
丁母碩人石氏憂詔復以帥幕起公固辭服除通判汀
州移疾至管亳州明道宮及江州太平館起知興國軍
改提舉兩浙及廣南市舶皆不拜累轉朝請太夫家居
十餘年安貧著書嘗評論夏少康迄唐肅宗得失號中

興龜鑑上之勅書褒答賜服金紫紹興七年高宗命左
司諫陳公輔密薦學術議論用心忠直可脩臺諫者公
輔首奏公問學淵源持論不阿操守可觀是夏召赴都
堂審察秦丞相檜止除提舉江東路常平茶鹽徽之休
寧縣因變法季增鹽五十八萬公請以比歲中數為額
邑人德之九年入為國子監丞公言郡邑上丁釋奠十
哲侑坐今大成殿惟設顏孟又上戊享武成王不應廢
牲牢且用東脯二遵而無配享其後禮官並從公言仍

增管仲至郭子儀十位配坐在職二年朝論推其靖共
擢尚書比部員外郎十一年八月輪九月升郎中初公
居閒脩定鄉飲酒儀至是增損其制以聞尋詔鏤板頒
行轉左朝議大夫十二年充省試叅詳官七月遷吏部
郎中十四年三月進左司郎中俄兼中書門下省檢正
諸房公事是時脩定郊祀講大朝會禮文交舉命公兼
太常少卿人咨其博前此銓曹都司例謝客不敢可否
事公獨振舉滯淹雖休沐猶引驗文書吏不得以微文

沮升改者惟秦蜀項用便宜遷轉僞冒公設科條盡革其弊嘗獲詐官法當賞公曰職也卒不言上重交隣歲擇卿監可任侍從者付以使指八月特賜對除權吏部侍郎假本曹尚書充金國賀正使初顯仁皇太后南歸沿途應奉權增頓次自後南北脩聘往來輒循其例又有請起兩淮稅者公使回具言淮民凋敝狀頓既復舊稅議亦格上眷方厚十五年冬引疾請去除數文閣待制提舉江州太平興國宮者再公謙恭清約存心忠厚

惟嗜讀書雖老不倦鄉黨儀之積官右中奉大夫十九
年四月甲寅卒於正寢享年七十有一十二月庚申葬
本縣龍山之南妻令人李氏前卒累贈普寧郡夫人遂
以合葬遣表聞贈左正議大夫子升朝累贈特進爵西
河縣開國子食邑五百戶公文辭雅實似其為人有集
三十卷二子勉終承直郎監行在文思院上界門劬終
朝散大夫新知南劍州七女長適朝奉大夫江西叅議
官董昌裔次未嫁而夭次適宣教郎史純臣早世再適

廸功郎主湖州武康簿吳曦次適朝請郎知興國軍陸
流次適承議郎司農寺丞柳綸次適奉直大夫前江西
提刑陸洸次適進士劉汝霖孫四人長祖洽也今以戶
部郎官總領湖廣江西京西財賦次祖壽早世次祖昌
登仕郎次祖坦修職郎紹興府會稽縣主簿亦早世孫
女四人長適朝奉大夫主管成都府玉局觀陸杞次適
通議大夫充敷文閣待制史彌大次適進士吳傳次適
從政郎紹興府上虞縣丞樓潭曾孫六人岳宣教郎知

台州仙居縣密迪功郎監泰州丁溪鹽場岡從事郎新
監臨安府新成縣稅密習舉業庾將仕郎康尚幼曾孫
女三人長適儒林郎嚴州文使錢萃次適奉議郎知江
州德化縣陳卓次未嫁銘曰

紹興中葉兵休衆熙穆穆聖皇垂拱無爲旁招吉士賢
任能使入從出疆匪庶常比孰端其身而濟其文猗歟
林公允也其人迪簡在庭靖共所蒞歸安故鄉終始無
愧德蓄於躬裕乃後昆克對無羞英英孝孫既念爾祖

亦鴻厥慶揭辭墓門永矣傳信

朝議大夫工部尚書贈通議大夫謝諤神道碑

嘉泰二年

孝宗皇帝知人善任使每擇恬靜正大之臣為諫官御史而宿其業常曰學術正則議論正議論正則是非公必不脩睚眦之怨計曖昧之過厥有大姦大佞為時指名則仁者之勇其肯舍諸彼徒以擊搏為能指摘細故豪強未必鋤善類或被害矣某久侍左右熟聞聖訓今

觀故煥章閣直學士謝公舉世稱為子長者其問學淹
貫內宜為儒林之官忠信慈惠外當付以民社然自監
察進殿中歷侍御史遂拜右諫議大夫以遺光宗為御
史中丞六七年間陳善閉邪遏惡揚善如漢孝文時議
論寬厚耻言人過失化行天下此孝宗用公大意也公
諱謨字昌國臨江軍新喻縣人其先叔方唐初為洪州
都督因家高安元和中有名華者徙居新淦十世孫懋
及其季岐子舉薦世克元豐八年同榜登科號臨江四

謝舉廉字民師蘓文忠公嘗與書論文即公四世伯祖
也曾祖臻祖誠俱有隱德世居新淦父革脩身樂道號
清風老人大觀中始徙新喻以公貴贈中大夫母胡氏
贈淑人公幼敏惠愿懋日誦書千言為文立成紹興二
十七年第進士以左迪功郎調峽州夷陵縣主簿未至
撫之樂安多盜監司檄公攝尉公條二十策大要使其
徒相糾而以信賞隨之羣盜果解散三十一年至夷陵
適金人渝平諸軍往來境上選行縣事有治辦聲三十

二年覃恩循左脩職郎用舉者陞左從政郎移吉州錄
事叅軍囚死給犗自公始陳氏訴其僮竊財匿民家辭
頗過寔帥龔公茂良欲坐以罪公列其不然帥由是知
公乾道四年廬陵艱食饑民萬餘守譙門求賑廩官吏
失措公亟植五色旗分部給糶頃刻而定其後江西再
旱帥命攝屬徧走郡邑凡用粟百萬斛而戶口獲濟者
百萬蓋公素以仁民愛物為心故事如此七年改左宣
教郎知袁州分宜縣縣負郡十萬緡公請蠲除於上司

會丁母憂後令許樞密及之申前說時公已在言路為之助併秀之華亭縣月椿重額皆得減免淳熙五年求主管台州崇道觀以便親明年丁父憂八年朝士推荐者多入幹辦行在諸司糧料院九年夏除國子監主簿十年春遷太學博士俄擢監察御史公素患差役不均居鄉勸民買田充儀役至是發處二州偶行之詔下其法諸路或以為疑公力陳其便湖州安吉縣稅絹許用麤絲名曰屑絹有司請却之公言邑既輸絲又織綾夏

稅已重故相乘除宜如故上並從之十三年九月為副
端言士大夫習不謹而皆徇私而背公習貪恣而廢廉
謹習刻薄而鮮寬厚習汰侈而恥節儉習輕率而昧詳
審習詐偽而罕真實習隱蔽而忘忠純如成湯制官刑
以儆之十四年升臺雜遘淮浙夏旱公條政事十二失
畫振濟七策天子嘉納十月入諫垣明年冬兼侍講公
奏帝王之學稽古為先六經皆古也而書為先可證後
世得失上曰人君不知學則自怠如唐太宗功非不高

恨不知學使能以書證得失豈復用兵高麗乎公又言
事無大小在乎立本揀弊而已帝王樂聞善言稽古不
倦正為二者陛下每言允執厥中蓋中則不倚自然本
立而弊除上曰所貴乎中無過不及朕最喜伊尹傳說
所學得事君之道公曰伊傳固然非成湯武丁信用之
亦安能致治公於啟沃大率類此嘗因夕對及邊事上
有乘機會之諭公曰機會雖不可失亦戒輕舉上再三
稱善一日與公論性上曰朕每讀孔子性相近及上智

下愚不移之說簡而易明知卿嘗從郭雍於此似有得
豈曾見程頤乎公奏雍父忠孝嘗侍頤時雍尚幼蓋得
其傳於父耳初雍已封冲晦處士於是加賜頤正先生
十六年春光宗登極公獻十箴一曰業難成而易敗宜
兢保之二曰道甚簡易在尊所聞三曰畏天之威四曰
存心公正五曰賞罰不可妄六曰獎廉戒暴七曰訪民
疾苦八曰理財以義九曰姦臣生亂甚於兵燹十曰自
治乃可理外又論治天下必有家法為長久之道又乞

舉人望以聳動中外又論二節三近宴飲妄費二節也
執政大臣舊學名儒經筵列職三近也上悅四月遂進
中執法會補闕薛叔似拾遺許及之並移卿監公言壽
皇復置此官用意甚遠今名遷而實廢非新政所宜頃
之徙權工部尚書力請去以直學士知泉州又辭遂提
舉江州太平興國宮凡歷三任紹熙五年十一月九日
以病卒享年七十有四官至朝議大夫娶胡氏封淑人
內助為多二子峴通直郎新江淮等九路都鑄錢司檢

踏官峙蚤沒三女適進士丁南容胡定彭煇伯孫男四
人淮迪功郎新筠州高安縣尉渭漳澧皆登仕郎孫女
三人長適歐陽珙次許胡逢吉一尚幼公孝友慈祥助
以學力每志於仁勇於義躬自厚而不責於人事親養
志無違教二弟義兼師友詰亦中第豐城益程筆力豪俊
公誨之曰詩詞特遊士之雄耳程即易業登科問道請
益者履滿戶外公隨其材器勉使成立姻戚交舊處之
合宜疾病死亡隨力周恤後生求詩文筆札應酬不倦

人人滿所欲而去初居縣南之竹坡榜曰良齋晚徙邑東竹木参天巖桂尤多命曰桂山二名聞於中外予在從班嘗被旨薦士及公姓名上遽曰是所謂良齋耶予問陛下何自知之上曰朕見其性學淵源五卷而得之耳公平生著述至多有良齋集四十卷論語詩書解各二十卷春秋左氏講義三卷柏臺諫垣奏議各五卷經筵總錄關三卷其它如金石庵類彙鈴岡約卓筆隱堂記自嬉集楚塞從臺雲根叢臺樵林機鑒南坡學林天

上詩稿江行雜著景符堂文稿尚數十編嘗進孝史五十卷詔付秘書省公量宏履坦行以忠恕待臧獲怡顏和氣皆得其歡心每語人云吾自得願正先生簡易之說用之不盡蓋亦天性也葬以慶元元年十一月甲申在袁州分宜縣神龍鄉鍾山里先塋之側其子以公高弟宣教郎新知衡陽縣歐陽朴所述事實求寶文閣待制楊公萬里表公之墓凡文章行誼登載已詳鄉人又曰螭首龜趺刻為歌詩以詒來世法也復使來請其銘

曰

舜遠不仁咎繇是翊舉直錯枉枉者自直念昔淳熙千古若稽公任臺諫斂藏角圭言忠謨嘉可獻否替彼激以訐視之何細司直於朝消伏兇共簡易之學始終頗雍展也醇儒其儀不忒詩廟諡工亦彰聖德

文忠集卷六十八

欽定四庫全書

文忠集卷六十九

平園續稿二十九

宋周必大撰

神道碑九

寶文閣學士通奉大夫贈少師梁公

汝嘉神道

碑嘉泰三年

高宗初元自幸維揚而周旋江浙然後定都臨安當是時忠足以尊君親上才足以撥煩治劇論思則援古證

今治郡則知所先後如戶部尚書梁公誠所謂國家之
寶臣不可以無傳也公諱汝嘉字仲謨處州麗水縣人
曾祖訥祖佐俱有隱德父文林郎固贈光祿大夫妣普
安郡夫人何氏公幼敏悟讀書不捨晝夜外王父清源
郡王何丞相執中奇之奏補登仕郎初以廸功郎主管
吏部官告院三被賞循儒林郎調中山府司兵曹事減
員改儀曹每以不可開邊釁為言帥怒劾奏未報敵兵
薄境委公持御香祝版祠北嶽欲陷公死地公蹈履艱

危禮成而返用舉者改京秩嘗辟燕山府路帥屬議論
不詭隨帥不悅公求還京師俄丁母憂營葬常州因家
焉靖康初服除就選知武進縣乙酉二月壬子六飛蒼
黃南渡甲寅次常官吏駭散公獨不去上異之顧大將
張俊刻姓名於御劍郡人張文靖公守方在朝亦誦公
治縣功升通判州事九月加直秘閣增陞濬隍陰為賊
備俄戚方來寇郡守周杞將遁公固留之賊退遷秩一
等既而敵騎大至杞退保宜興部民數萬倚公安集特

遷承議郎未幾擢提舉本路茶鹽公事紹興改元夏漕
臣請令亭戶輸二稅物斛佐邦用公言民煮海代耕故
皇祐著令估價錢以優之驟變法必將逃亡大失國課
公私受害詔從舊法二年春除兩浙轉運判官又陞副
使兼權臨安府市皆爰舍數火公始陶瓦易之三年七
月進直龍圖閣正知府事首繕庠序以示風化金遣使
來適殿柱壞詔亟葺治公心計有餘凡梁柱竹木瓦石
丹漆皆度廣狹高下素為儲峙一夕告成上自宮省下

至營屯及百司官廨區處悉有方始成都邑上諭公曰
前政宋輝俗而懶盧知原繆而執今得人矣四年特除
徽猷閣待制俄進戶部侍郎仍兼臨安公以闕

辭五

年春進顯謨閣直學士知府事初浙西安撫使移隸京
口至是改付公遂為定制六年秋課報劉豫挾金入寇
上將幸金陵疑用度不足公以辦告遂為隨駕都轉運
使兼江西沿海置制使七年春再為戶部侍郎領漕如
故九月請外以實文閣直學士知平江府八年正月駕

還公請便郡初移台州旋易婺州復以戶部侍郎召金人議和樞掾胡忠簡公銓上書得罪公與侍從六人同對謂敵情難測後必背盟禮不可過又言

闕

太重

奏豪多

闕

出公手上不以為忤當路始不樂會言者謂

祖宗時常平總於戶部今以諸路茶鹽司分領但置主管官一員為之屬金穀陷失以此又發運使本通融六路財賦致之中都今乃設經制發運使歲給糴買錢數百萬失回易市易贍軍等錢至千萬緡二者皆徇名失

實九年二月詔改發運為經制司而提舉茶鹽勿兼常
平擇戶部長貳一員併領之諸路主管屬官各為經制
某路幹辦公事公遂兼江淮荆浙閩廣經制使三月進
權太常伯兼許定一司勅令上擇象簡而賜公示大用
意時相諷言路排擊雖報聞而公不自安力求去秋以
舊職提舉江州太平觀十年冬起為川陝都轉運使公
前謂金必渝平懇辭已而果然東京留守孟庾降上謂
侍臣曰庾不可任惟梁某為朕言之知平江府兼浙西

沿海制置使輟御前金器以賜至則一新學宮巨木浮海而至適中大成殿梁士民嗟異十一年明州妖僧法恩作亂選公經手仍兼浙東沿海置制使過闕升寶文閣學士上嘗密以千文號付公有所見勿拘遠近實封直達公感激恩遇知無不言前後條上便宜如分命諸將控扼要害收陝西戍兵以固全蜀論歸正人不當遣至謂大臣措畫失宜為諸將所輕願出宸斷毋失事機胡世將雖專任川陝宜擇人副之又乞分大軍為三一

據地利一往來策應一留視營寨使敵常為客我常為主又奏用張俊韓世忠岳飛於西府劉錡守荆南皆奪其兵無復進取之計上每嘉納踰歲請祠歸明年秋知温州未幾夏潦公竭力賑恤併奏江浙閩皆大水願降德音蠲租稅仍勅有司省不急以補經費十五年四月彗出東方乞下詔求言皆中外喋莫敢及者十六年正月移知宣州悼亡乞祠從之自是凡再任太平宮二十一年起知鼎州再歲復引疾奉祠二十四年十月二日

薨於里第享年五十九越明年十月丁酉葬松陰縣惠
洽鄉之原階自宣教郎年勞賞曲積至右通奉大夫致
仕贈右宣奉大夫諸子升朝累贈少師爵自麗水縣男
至縉雲郡公食邑自三百户至二千四百户實封一百
户公識慮絕人行以忠恕內更劇曹他人膠擾公獨整
暇外歷八郡人安其政上用公意殊未已不幸位未

闕

亦弗克壽議者至今惜之夫人葉氏同郡處士俊
之女與公共歷艱難同留武進名聞禁中心無妬忌稱

於族黨子十一人從事郎伯璩承事郎仲璉朝奉郎叔
玠朝請大夫季珩宣教郎季璆宣義郎季琦奉議郎季
璠朝請郎季璋吏方文采多濟世美季璵季璣不及仕
今惟季琚以朝請大夫尚書戶部郎中總領淮東軍馬
錢糧孫一十七人其知名者仲申終宣教郎知明州奉
化縣舒終從政郎興國通山縣令叔括登進士第終迪
功郎溫州樂平縣主簿錯紹熙甲科終文林郎衡州州
學教授銓迪功郎新楚州鹽城縣主簿鉅太學生鑑鄉

貢進士鉞迪功郎信州上饒尉鎮脩職郎旌德尉鑰迪
功郎新饒州安仁尉銖將仕郎曾孫二十人元孫三人
某將仕郎公篤於友愛與其弟未嘗相捨收恤孤甥畢
其婚嫁力教子孫儒風彬彬其興殆未艾也既沒五十
餘年豐碑未立季子戶部君方為時用乃以故叅知政
事辛公次膺所撰誌銘及家傳屬某緒次昔我先太師
秦國公早與公遊某以孤童宦學未成已知公譽望在
人公亦間從諸父訪先公之後竊有感焉暨某立朝得

識公諸子追懷先契其何敢辭乃質之史氏叅憶舊聞
為之銘曰

瀕洞風塵牧守跳奔公一令耳心存至尊節錯根盤鋒
鏗必礪公處其間雍容允濟才難固然知德尤艱公議
人事誠心每殫訟理政平已曰循吏公歷郡國儒飾吏
事維西有樞謂公往諧命乃在天夷燹辰階知公於初
紀德於晚撫實刻辭其尚行遠

史館吏部贈通議大夫朱公

松

神道碑

嘉泰三年

祖宗時擇儒學為館職自館職擇侍從由侍從擇輔相所謂儒學者明仁義禮樂通古今治亂其議論可與謀慮大事決疑定策文章特一事耳治平中歐陽文忠公在政府奏疏如此尋命宰執各薦士其效見於元祐之際高宗方內脩外攘首置秘書省以儲人才他有司治事日不暇給獨職館涵養從容要路闕必由此選國朝盛舉乃復見之新安朱公蓋其一也公諱松字喬年世家婺源曾祖振妣汪氏祖絢妣江氏父森常曰吾家五

世積德業儒當有顯者後贈承事郎妣儒人程氏公生以紹聖四年兒時出語驚人未冠力學繇郡庠貢京師文體清新耻於蹈襲政和八年上舍登第以迪功郎調

關

州政和尉丁父憂服除再調南劍州尤溪尉監泉州

石井鎮詩名聞四方他文渾浩流轉惟意所適然關於

道為遠益取經子史傳考其興衰治亂欲應時合變見之事業又因師友浦城蕭顗子莊劍浦羅從彥仲素而得龜山楊文靖公河洛學問之要拳拳服膺每疑卞

急害道取佩章之說名齋自警在尤溪間靖康北狩大
慟幾絕自是奔走卑冗假祿養親無仕進意紹興初監
察御史胡世將撫諭入閩公袖書告之曰今不自荆襄
赴興元結夏人控引五路東嚮爭中原則當幸金陵固
守荆淮柰何局促一方徒費日月竟將何為世將竒其
才歸薦於朝會前執政謝公克家守泉南亦露章薦公
學問不宜滯筦庫遂召試館職策問中興難易公乞順
人心任賢才正綱紀累數千言辯論精博高宗嘉賞除

秘書省正字四年二月循左從政郎趙忠簡公以元樞
都督諸路軍馬約公入幕公以親疾辭尋丁母憂七年
服闋上已進都金陵九月再詔對公勸上抗志高明垂
精延訪求經遠持久計遂言中興之君惟光武身濟大
業可以為法元帝肅宗志趣卑近宜以為戒上明日對
輔臣稱善且謂光武無可議肅宗雖優於元帝然虧人
子之行於其闕為可恨也特改左宣教郎除校書郎是
時呂祉代劉光世統軍淮西鄺瓊擁衆叛去廟論欲斂

兩淮戍兵衛行都公率同列疏言不可亦會金疑劉豫
叛兵不可制執而廢之闕路不能乘機會乃亟闕臨安

八年三月遷著作佐郎御史中丞常同薦公可任大事
四月復賜對言國論不過兩端進取者失之踈玩愒者
失之媮惟自治觀釁為上策願陛下並進忠賢脩明紀
律革姑息振國勢敵不足平也上悅擢尚書度支員外
郎兼史館校勘刊脩蔡卞所改哲宗實錄公用力為多
歷司勳及吏部員外郎史職如故實錄成遷左奉議郎

磨勘轉承議郎趙忠簡公罷相秦忠獻公當國決意講
和公與史官胡瑍凌景夏常明范如圭合奏陛下以梓
宮母兄天屬未歸不憚屈已和戎曾不思項羽置太公
俎上邀高祖知其詐日夜思所以感羽者彼兵疲勢窮
太公自歸此今日龜鑑也秦方惡公異議叅知政事李
莊簡公又力援公屬金使再至許歸河南地公請用漢
制命廷臣雜議又言二三大將握重兵將有尾大之患
請復武舉儲將帥選驍勇補周衛擇守帥壯藩籬興太

學明大倫以倡節義規摹大率類此秦滋不樂諷言者
論公懷異自賢出知饒州十年春也未上請主管台州
崇道觀和議俄變秦蒼黃不知所措有郎官代作自解
之奏曰伊尹告成湯德無常師主善為師臣前贊議和
今請伐敵是皆主善為師如不濟則陳力就列不能者
止當遵孔聖之訓秦大喜擢郎官為右史而不暇問所
引皆誤也是時秘書省寓法慧寺或大書於門云周任
為孔聖太甲作成湯秦大怒疑出於館職相繼汰去而

引其黨公遂不可出矣祠滿再任命下而卒十三年三月辛亥也享年四十有七公性孝友於朋友重然諾不以死生窮達易其節誘進後學揚人之善凡邪佞嵬瑣鄙而遠之沒一甲子秦薨異時名士抑遏竄逐者悉起為大官獨公無年識者惜之其將終也手書與所善胡憲原仲劉勉之致中劉子翬彥冲屬其子熹使往受業其後遂以興學高文推重當世今上聞其名以待制侍講禁中累贈公通議大夫初公卒之明年築建寧府崇

安縣五夫里西峪山勢頗卑下乃卜慶元某年某月某日遷葬武夷鄉上梅里寂歷山中峯僧舍之北公嘗賦詩有鄉關落日蒼茫外尊酒寒花寂歷中之句茲其識乎待制以某先太師與公為同年進士故來請銘公娶同郡祝氏處士確之女贈碩人事姑孝謹待內外姻親和順得其歡心後公二十七年卒別葬建陽縣崇泰里後山鋪東寒泉塢一男熹也女嫁瀏陽丞劉子翔早世孫男三長塾已亡次塾將仕郎次在承務郎女三人脩

職郎劉學古迪功郎黃幹進士范元裕其婿也曾孫男
五人鉅鈞鑑鐸銓女九人長適文林郎趙師夏餘未行
公平生所為文有韋齋集十二卷行於世外集十卷藏
於家吏部侍郎徐度自言少多與前輩游追識公及張
戒定夫始得為文之法欲為公集序未及成而文士傳
自得實為之謂公詩高潔幽遠其文溫婉典裁非溢美
也公母弟棣亦負軼才不肯俯仰於世有詩數十篇高
遠近道號玉瀾集云銘曰

信道惟人窮理以書合而一之乃曰通儒表表朱公邁
往於初師友淵源名實允孚蘭臺史觀卿才是儲有昌
其言有宏厥模人雖我抑豈無後圖高皇更化羣賢畢
趨公則逝矣齋志弗紓幸哉有子播穫苗畝追爵黃散
肇營新墟揭以銘章永鎮龜趺

資政殿學士中大夫叅知政事贈太師李文敏

公邴神道碑

嘉泰元年

濟水貫兗與徐居古九州之二其在四瀆得天地質信

寬徐之氣其澤曰大野是為十藪之首鍾英炳靈今於
故叅知政事文敏李公見之始以淵源之學華重之文
藻飾王度中以剛大之氣扶顛持危晚以超卓之見居
安資深允所謂間生之賢者也公諱邴字漢老系出唐
郇王諱其十一世孫濤仕五代為相入本朝歷兵部尚
書生水部郎中承休公高祖也水部生廣文館進士贈
兵部尚書諱仲寶加贈太子太保者公曾祖也官保次
子諱景山官至駕部郎中贈太子少傅兩娶蘭氏贈咸

寧郡夫人公祖父母也朝請大夫諱瑒贈少師公父也
娶仲氏鎮國夫人孔氏鄆國夫人高曾皆葬濟陰伯祖
殿中丞景圭及官傳葬濟之任城故公為濟州鉅野縣
人幼警敏喜讀書弱冠能文伯父樂靜先生昭玘嘗從
眉山蘇文忠文定公御史中丞孫公覺門下侍郎李公
清臣講論文章仕至起居舍人性靜厚忠實其文演迤
貫理穩密不露斲削公獨得其傳崇寧五年登進士第
授將仕郎德州平原尉上官待以異禮秩滿升從政郎

濮州鄆城丞外艱服除執政知其名用為編脩國朝會
要所檢閱文字宣和初以儒林郎特除秘書省校書郎
改宣教郎二年十月擢尚書禮部員外郎時中外泰祥
瑞無虛日公草賀表筆不停綴精確典麗三年夏進起
居舍人是冬以通直郎試中書舍人賜服金紫五年七
月遷給事中閏月權直學士院陳橋顯烈宮成特命公
撰文刻石明年八月入翰林為學士徽宗曰內外制得
卿稱職矣高麗入貢選充館伴會召宰輔親王貴戚宴

睿謨殿賞橙橘侍從預者纔四五人而公在焉詔賦紀
事詩公垂館客夜草百韻以進上大嘉遣中使持示麗
人麗人表謝乞傳水以歸凡私覲悉加等適蔡京再領
三省言路觀望適公作大晏樂語盛稱鎮圭為罪黜提
舉南京鴻慶宮七年冬除徽猷待制知越州為政清簡
抑強扶弱欽宗覃恩轉承議郎詔諸路兵備胡公擇掾
屬通明者付以調發城中至不聞兵出議者猶論公前
因時宰驟進而不知至眷素厚也坐落職提舉西京嵩

山崇福宮高宗初年復右文殿脩撰踰年召為兵部侍郎再直學士院三年二月壬子車駕南渡壬戌至杭州三月癸未苗傳劉正彥反露刃宮門上登樓撫諭公亟趨前叱責傳等堯焰稍息又諭殿帥王元擊賊元唯唯公扣宰相朱勝非問計策傳等皆在公反覆鑄詰人為公危公無懼色退勸勝非密引外援制賊又謂傳所聽者正彥正彥則倚王世脩為謀主宜陽許世脩侍從以間之蔑不濟矣太后垂簾旬餘勝非遂奏變故以來從

官能助朝廷者惟李邴鄭戩協心於內誦言於外乃除
公翰林學士戩御史中丞呂頤浩張浚劉光世闕等

義師起公與權直院張守分撰請復辟表及批荅丙午
勝非白太后除公與戩並為端明殿學士同簽書樞密
院事四月戊申朔上御朝明日遷公尚書左丞自朝散
郎例轉中大夫公懇辭上賜親札畧曰卿毅然正詞氣
折兇醜萬衆動色具臣醜顏公謝表亦云謀寢淮南雖
慙素望笏擊朱泚實厲壯心詰責兇渠激揚禁衛追成

復辟實與秘謨蓋出孤忠豈徼後福當時稱為實錄乙卯大赦其文云斷螯立極開辟功成取日授龍神明御正亦公所草四方誦之駕幸江寧六月依祖宗舊制合三省官改叅知政事尋以防秋分六宮百司奉太后如洪州命公為資政殿學士權知行臺三省樞密院事公與相臣呂忠穆公議論不協臺諫有向背意公聞之固辭八月仍本職提舉洞霄宮上念公不已未閱月起知平江府視事三日復從請祠兄鄴帥越失守連坐落職

明年復端明紹興元年大禮還舊職十六年五月甲午以疾薨於泉州居第之正寢享年六十有二遺表聞贈正奉大夫八月庚申葬南安縣石鼓山之原爵隴西縣開國男食邑四百戶妻東平郡夫人任氏朝請郎之立女前七月卒五子縝警悟絕人不樂仕進號萬如居士有梅詩百篇終朝請大夫侍講朱熹揭其墓維宣教郎贈朝奉大夫紀疾廢綸朝奉大夫紉承議郎贈朝請大夫五女長適朝奉大夫直秘閣傅自得次適左廸功郎

趙如川再適朝請郎晁子鑑次適通直郎梁夔次適從
政郎仲壽朋次適迪功郎馬諒再適迪功郎傅伸孫男
十四人詵承議郎讜承奉郎諤從事郎諫承務郎誼朝
散郎謙承務郎訥從事郎詵今為朝奉大夫荆湖北路
轉運判官說通事郎訢從事郎諲將仕郎詠訥諤孫女
十一人公天資高明積學深至早歷清要號稱文士粹
遇國難大節凜然為廊廟之器嘗奉詔編類平江勤王
及奏請本末付禮部鏤板公既列上即匱藏元牘後自

泉南繳納省中子孫始知一時定計具草手疏皆出公及朱丞相之手執政著名押字而已罷政十七年避時相不復出讀書作文雖病不廢延納後進教誘無倦稱人之善覆護所短若親舊行已未至則質問再三使歸之正奉養簡薄賑恤宗族治家嚴而恕每愛徐孺子申屠子陶淵明之為人晚棄世故深造以道夫子所聞夕死者蓋得之所著草堂前後集一百卷行於世其葬也寶文閣待制趙思誠為之誌諸子遇恩累贈公太師配

封魯國夫人淳熙初公薨三十餘年矣近臣及公叱咄
劉事孝宗嘉嘆特令定謚其後有司以勤學好問曰文
應事有功曰敏易公名今公諸孫惟季子之子訖在
典州持節學世其家以公神道未碑遠使來請某久備
史官得公出處故詳書而系以銘曰

齊魯之間儒學之淵道閉賢隱祥麟出焉由漢迄唐士
多名世公生盛朝亦拔乎萃其來儀儀資適逢時以文
華國天子所知變起弗圖公奮烈烈面折羣兇我勇彼

懾籌幄既咨義旗既麾中外協力乾清坤夷倬彼宸章
梁若星日告於萬邦丕顯公蹟上方用公公曰歸歟成
功者天寵則難居燕處超然道則深造窮理盡性庶其
允蹈生有自來逝也名垂刻詩道周言何敢欺

文忠集卷六十九